

28 AUG 2003

Abdullah-Onn

DATUK ONN TINGGALKAN TELADAN PERJUANGAN YANG BERANI: ABDULLAH

JOHOR BAHRU, 28 Ogos (Bernama) -- Datuk Seri Abdullah Ahmad Badawi hari ini berkata keberanian, semangat juang yang tinggi dan perpaduan rakyat yang berjuang mencapai kemerdekaan merupakan teladan terbesar dalam perjuangan pengasas Umno, Allahyarham Datuk Onn Jaafar.

Timbalan Perdana Menteri berkata walaupun British pada masa itu merupakan sebuah negara yang besar dan kuat tetapi dengan keberanian, semangat juang yang tinggi dan kesanggupan bersatu padu di kalangan rakyat, akhirnya memaksa British memberikan kemerdekaan.

"Bagi saya, pengajaran paling besar sekali ialah kalau kita berani, sanggup pula bersatu padu, berjuang pula dengan penuh semangat...tidak ada halangan dan rintangan untuk membolehkan kita mencapai matlamat perjuangan kita," katanya ketika melancarkan buku "Imbasan Peristiwa-peristiwa Sebelum Kemerdekaan Malaya" versi Bahasa Melayu di sini.

Buku itu terjemahan daripada buku "Reflections of Pre-Independence Malaya" karya Datuk Mohamed Abid, seorang anggota keluarga terdekat Datuk Onn.

Versi Bahasa Melayu itu diterjemahkan oleh Shajaratuddur Sh. Abdul Halim.

Versi Bahasa Inggeris buku itu telah dilancarkan oleh Perdana Menteri Datuk Seri Dr Mahathir Mohamad di Putrajaya pada 12 Jun lalu.

Abdullah berkata perjuangan Datuk Onn juga memberi kemenangan pertama kepada rakyat Malaysia, khususnya orang Melayu dalam menuntut kemerdekaan apabila Allahyarham sebagai pemimpin bangsa telah memecahkan tembok-tembok puak, kedaerahan dan negerian di kalangan orang Melayu.

Beliau berkata walaupun Datuk Onn tidak ada lagi bersama Umno pada hari ini tetapi semangat perjuangan, keberanian dan iktibar perpaduan yang ditunjukkannya dihayati dan didokong oleh ratusan ribu generasi muda Umno sekarang.

"Mudah-mudahan buku ini akan dapat disebarikan untuk dibaca dan dimanfaatkan oleh lebih ramai generasi muda Malaysia," kata Abdullah.

Sementara itu pada kulit belakang buku itu dipaparkan petikan kata-kata Dr Mahathir dan Abdullah.

Dr Mahathir dipetik berkata: "Dato' Onn memimpin orang Melayu pada masa yang sangat diperlukan oleh orang Melayu dalam sejarah mereka. Orang Melayu hampir disingkirkan dari negeri mereka sendiri! Dato' Onn sahaja yang dapat dianggap sebagai pejuang Melayu yang pertama yang memimpin perjuangan negara menentang British."

Petikan kata-kata Abdullah pula berbunyi: "Tanpa Dato' Onn tidak akan ada Umno, tanpa Umno tidak akan lahir 'Perikatan', tidak akan ada Tunku Abdul Rahman, tanpa Perikatan antara Umno, MCA dan MIC, kita tidak akan mencapai Kemerdekaan."

Menteri Besar Datuk Abdul Ghani Othman pula ketika berucap pada majlis itu, berkata: "Datuk Mohamed Abid telah mencantumkan catatan-catatan kecil ini menjadi seutas rantai mutiara yang dapat memberikan gambaran hidup Datuk Onn yang lebih lengkap, lebih sempurna, lebih bermakna dan lebih benar."

-- BERNAMA

MNY MOZ